



Broj/Број: 03/1-50-1-9-32/09
Sarajevo/Сарајево, 2.2.2009.godine

Z A P I S N I K

32. sjednice Zajedničke komisije za odbranu i sigurnost BiH Parlamentarne skupštine BiH, održane 2. 2. 2009., u vremenu od 11,00 do 12,10 sati

Sjednici su prisustvovali svi članovi Zajedničke komisije: Branko Zrno, Šefik Džaferović, Slobodan Šaraba, Drago Kalabić, Vinko Zorić, Jozo Križanović, Mirko Okolić, Ivo Miro Jović, Hazim Rančić, Dušanka Majkić, Sulejman Tihiić i Adem Huskić.

Sjednici su prisustvovali gosti, predstavnici medija, kao i predstavnici Sekretarijata Parlamentarne skupštine BiH:

- Marina Pendeš, Ministarstvo odbrane BiH,
- Midhat Izetbegović i Damir Karahodžić, Ministarstvo vanjske trgovine i ekonomskih odnosa BiH,
- Ermin Pešto, Stanić Radenko, Samir Agić i Ljubomir Kuravica, Ministarstvo sigurnosti BiH,
- Božica Bojović, Kabinet predsjedavajućeg Vijeća ministara BiH,
- Maja Ribar i Senad Zlatar, OHR,
- Maja Šetić, EUPM,
- Jasna Dragičević, OSCE misija u BiH,
- Lejla Hadžihasanović, NATO HQ,
- Christian Haupt, Civilno društvo,
- Zoran Brkić, Sektor za odnose sa javnošću PS BiH,
- Dragica Hinić, sekretar Zajedničke komisije za odbranu i sigurnost BiH, Željko Grubešić, stručni savjetnik, i Jovica Katić, stručni saradnik u Zajedničkoj komisiji za odbranu i sigurnost BiH.

Sjednicom je predsjedavao **Branko Zrno**, predsjedavajući Zajedničke komisije za odbranu i sigurnost BiH. Članove zajedničke komisije upoznao s dnevnim redom predloženim za ovu sjednicu, kao i s prijedlogom dopune dnevnog reda, koji sadrži:

- Izvještaj o radu Ministarstva odbrane BiH za 2008. godinu,
- Zahtjev za dostavljanje mišljenja o eventualnim izmjenama i dopunama poslovnika domova PS BiH u vezi s nadležnošću Zajedničke komisije,
- Poziv UNDP-a za učešće na inauguralnoj ceremoniji za uništenje municije u Vitezu, 4.2.2009.,
- Informacija o održanom sastanku s gosp. Rohanom Maxwellom, v.d. političkog savjetnika u Sarajevu, 27. 1. 2009.

Dušanka Majkić navela je da nije dobila materijal za dopunu dnevnog reda, te je predložila da se stoga iz prijedloga za dopunu dnevnog reda ove sjednice skine Izvještaj o radu Ministarstva

odbrane BiH za 2008. godinu, s obzirom da se radi o obimnom materijalu, dok se ostale tri tačke mogu razmatrati na ovoj sjednici.

Adem Huskić konstatirao je da je on dobio ove materijale, ali se saglasio s prijedlogom Dušanke Majkić. On je rekao da se od posljednje sjednice Zajedničke komisije desilo hapšenje Vjekoslava Vukovića, pomoćnika ministra sigurnosti BiH za organizirani kriminal i terorizam, te sugerirao da Zajednička komisija o tome, u okviru tekućih pitanja, zatraži od Ministarstva sigurnosti BiH detaljnu informaciju.

Branko Zrno zaključio je raspravu i dao na glasanje dopunjeni dnevni red, iz kojeg je izbačena tačka o Izvještaju o radu Ministarstva odbrane BiH za 2008. godinu.

Članovi Zajedničke komisije potom su jednoglasno usvojili sljedeći

DNEVNI RED

1. Usvajanje Zapisnika 31. sjednice Zajedničke komisije;
2. Razmatranje Prijedloga zakona o graničnoj kontroli, prva komisijaska faza (predlagač: Vijeće ministara BiH);
3. Razmatranje Prijedloga zakona o izmjenama i dopunama Zakona o policijskim službenicima BiH, prva komisijaska faza (predlagač: Vijeće ministara BiH);
4. Razmatranje Prijedloga zakona o oružju, prva komisijaska faza (predlagač: Vijeće ministara BiH);
5. Razmatranje Prijedloga zakona o izmjenama i dopunama Zakona o proizvodnji naoružanja i vojne opreme, druga komisijaska faza (predlagač: Vijeće ministara BiH);
6. Razmatranje Odluke o učešću pripadnika Oružanih snaga BiH u misiji „Snage međunarodne sigurnosne pomoći (ISAF)“ u Islamskoj Republici Afganistan (predlagač: Predsjedništvo BiH);
7. Razmatranje Odluke o postavljenju profesionalnih vojnih lica na formacijska mjesta u Oružanim snagama BiH (predlagač: Predsjedništvo BiH);
8. Razmatranje Informacije o realiziranju zaključaka Zajedničke komisije za odbranu i sigurnost BiH sa članovima Odbora za sigurnost i odbranu Skupštine Crne Gore (sačinilac: Ministarstvo sigurnosti BiH);
9. Zahtjev za dostavljanje mišljenja o eventualnim izmjenama i dopunama poslovnika domova PSBiH u vezi s nadležnošću Zajedničke komisije;
10. Tekuća pitanja:
 - a) Poziv za učešće članova Zajedničke komisije na Konferenciji Jadranske povelje u Tirani, 23. i 24. 2. 2009.;
 - b) Poziv OSCE-a za učešće predstavnika Zajedničke komisije na Seminaru iz oblasti sigurnosne politike, 10. i 11. 2. 2009.;
 - c) Poziv UNDP-a za učešće na inauguralnoj ceremoniji za uništenje municije u Vitezu, 4. 2. 2009.;
 - d) Informacija o sastanku s gospodinom Rohanom Maxwellom, v.d. političkog savjetnika u Štabu NATO-a u Sarajevu, 27. 1. 2009.;
 - e) Zahtjev za dostavljanje informacije o hapšenju Vjekoslava Vukovića, pomoćnika ministra sigurnosti BiH za organizirani kriminal i borbu protiv terorizma.

Ad. 1. Usvajanje Zapisnika 31. sjednice Zajedničke komisije

Komisija je bez rasprave, jednoglasno, sa 11 glasova „za“, usvojila Zapisnik 31. sjednice Zajedničke komisije.

Ad. 2. Razmatranje Prijedloga zakona o graničnoj kontroli, prva komisijska faza (predlagač: Vijeće ministara BiH)

Branko Zrno podsjetio je da već šesti put Zajednička komisija razmatra ovaj prijedlog zakona, te istaknuo da je Komisija do sada pred sobom već mogla imati novi prijedlog zakona da je Predstavnički dom usvojio prvo mišljenje koje mu je Zajednička komisija dostavila. Potom je otvorio raspravu.

Adem Huskić upitao je predlagača Zakona da li njegovo usvajanje ima veze s olakšanim viznim režimom za građane BiH.

Ermin Pešto, predstavnik Ministarstva sigurnosti BiH, odgovorio je da se oblast regulirana Zakonom može dovesti u vezu s Mapom puta za liberalizaciju viznog režima, s obzirom na obavezu BiH za usklađivanjem zakonske regulative sa standardima EU, a da je jedna od tih obaveza i usklađivanje Prijedloga zakona o graničnoj kontroli s ovim standardima.

Adem Huskić zamolio je potom članove Komisije da se, kada su na dnevnom redu svih komisija PSBiH zakoni koji su u vezi s približavanjem BiH EU, odnose na poseban način i da ne obaraju olako ovakve zakonske prijedloge. U tom smislu predložio je da se ovaj zakon usvoji u prvom čitanju prvenstveno iz navedenih razloga, te da se njegove eventualne korekcije vrše kasnije, u amandmanskoj fazi. Također je naglasio da bi bilo dobro da ovakvi zakoni, prilikom njihovog razmatranja u nadležnim komisijama i na sjednicama domova, imaju nešto veću logističku podršku, u smislu da njihovo razmatranje na sjednicama prati adekvatno osoblje iz institucije predlagača, kao i predstavnika Direkcije za evropske integracije BiH.

Branko Zrno istakao je da će prijedlogom novog teksta poslovnika o radu oba doma PSBiH, između ostalog, biti regulirano i ovo o čemu je govorio Huskić. Potom je zamolio članove Komisije da se izjasne o principima Prijedloga zakona o graničnoj kontroli.

Odlučivanje u prvoj komisijskoj fazi

Sa šest glasova „za“, četiri glasa „protiv“ i jednim „suzdržanim“ glasom, uz dovoljnu prostu većinu, ali bez saglasnosti predstavnika iz srpskog naroda, konstatirano je da Zajednička komisija nije podržala u prvom čitanju Prijedlog zakona o graničnoj kontroli BiH, sa istim obrazloženjem kao i prethodnog puta.

Ad. 3. Razmatranje Prijedloga zakona o izmjenama i dopunama Zakona o policijskim službenicima BiH, prva komisijska faza (predlagač: Vijeće ministara BiH)

Branko Zrno je u uvodnim napomenama istakao da se radi o prijedlogu izmjena i dopuna kojim se usaglašava tekst postojećeg zakona sa usvojenim zakonima u vezi s policijskom reformom.

Dužanka Majkić istakla je da, s obzirom da se ovim prijedlogom zakona vrši harmonizacija s odredbama Zakona o Direkciji za koordinaciju policijskih tijela i agencijama za podršku policijskoj strukturi, te usaglašavanje sa donesenim Zakonom o plaćama, ovaj prijedlog zakona treba prihvatiti. Branko Zrno zaključio je raspravu i pozvao članove Komisije da se izjasne o principima Prijedloga zakona o izmjenama i dopunama Zakona o policijskim službenicima BiH

Odlučivanje u prvoj komisijskoj fazi

Zajednička komisija za odbranu i sigurnost BiH je, sa 10 glasova „za“, jednim glasom „protiv“ i bez „suzdržanih“ glasova, usvojila Prijedlog zakona o izmjenama i dopunama Zakona o policijskim službenicima BiH i uputila takvo mišljenje u daljnju parlamentarnu proceduru.

Ad. 4. Razmatranje Prijedloga zakona o oružju, prva komisijska faza (predlagač: Vijeće ministara BiH)

Branko Zrno naveo je da se drugi put razmatraju principi Prijedloga zakona o oružju pred Zajedničkom komisijom za odbranu i sigurnost BiH, te otvorio raspravu o ovom zakonu. Kako nije bilo prijavljenih diskutanata, on je zaključio raspravu i pozvao članove Komisije da se izjasne o principima Prijedloga zakona o oružju.

Odlučivanje u prvoj komisijskoj fazi

S osam glasova „za“, tri glasa „protiv“, bez „suzdržanih“ glasova, uz dovoljnu prostu većinu, ali bez saglasnosti predstavnika iz srpskog naroda, konstatirano je da Zajednička komisija nije podržala u prvom čitanju Prijedlog zakona o oružju, sa istim obrazloženjem kao i prethodnog puta.

Ad. 5. Razmatranje Prijedloga zakona o izmjenama i dopunama Zakona o proizvodnji naoružanja i vojne opreme, druga komisijska faza (predlagač: Vijeće ministara BiH)

Branko Zrno u uvodnim napomenama istakao je da se Zakon nalazi u amandmanskoj fazi, te da je amandmane na ovaj prijedlog zakona podnijela član Komisije Dušanka Majkić. Također je naveo da je za ove amandmane u nekoliko navrata do sada traženo mišljenje od Vijeća ministara BiH, a da predstavnici ove institucije nisu odgovorili na zahtjeve Zajedničke komisije. Stoga je na prošloj sjednici ova tačka ponovno skinuta s dnevnog reda. Potom je predložio dvije mogućnosti, i to da Komisija na ovoj sjednici glasa o amandmanima bez dostavljenog mišljenja Vijeća ministara BiH, a potom i o samom zakonskom prijedlogu, ili pak da zatraži od Kolegija ponovno produženje roka za dostavu izvještaja o ovom zakonu, a da se Vijeću ministara BiH pošalje ponovna urgencija za dostavu navedenog mišljenja.

Damir Karahodžić, predstavnik Ministarstva vanjske trgovine i ekonomskih odnosa BiH, upoznao je članove Zajedničke komisije da zahtjev ovog ministarstva za dostavu mišljenja o Zakonu još nije razmatran na sjednici Vijeća ministara BiH.

Dušanka Majkić zaključila je da je, pošto se konkretno radi o njenim amandmanima, logično pričekati konačni stav Vijeća ministara BiH o njima.

Branko Zrno, zaključujući raspravu, predložio je da Zajednička komisija zatraži od Kolegija ponovno produženje roka za dostavu izvještaja o ovom zakonu, a da se Vijeću ministara BiH ponovo pošalje urgencija za dostavu mišljenja o amandmanima na Prijedlog ovog zakona.

Članovi Zajedničke komisije potom su jednoglasno, sa 11 glasova „za“, prihvatili prijedlog Branka Zrne.

Ad. 6. Razmatranje Odluke o učešću pripadnika Oružanih snaga BiH u misiji „Snage međunarodne sigurnosne pomoći (ISAF)“ u Islamskoj Republici Afganistan (predlagač: Predsjedništvo BiH)

Branko Zrno konstatirao je da sjednici ne prisustvuje predstavnik Predsjedništva BiH, koje je ovlašten predlagač ove tačke dnevnog reda. Zatim je otvorio raspravu o ovoj tački.

Slobodan Šaraba naveo je da je neko iz Predsjedništva BiH morao prisustvovati današnjoj sjednici, jer se rasprava o ovoj tački dnevnog reda ne bi smjela završiti samo između članova Zajedničke komisije. Naglasio je da u ovoj odluci nedostaje detaljniji opis sigurnosnog aspekta mjesta na koje se upućuju naši oficiri, te je zatražio detaljniju informaciju o tome.

Branko Zrno rekao je da će se u zapisniku konstatirati navedena primjedba i da će se od ovlaštenog predlagača zatražiti da članovima Komisije, kao i ostalim poslanicima i delegatima na sjednicama domova PSBiH, prezentira detaljnija informacija o sigurnosnom aspektu mjesta gdje se upućuju pripadnici OSBiH u okviru Misije ISAF u Islamskoj Republici Afganistan.

Dužanka Majkić navela je da Parlamentarna skupština BiH, na osnovu Odluke Predsjedništva BiH, vrši njenu verifikaciju o učešću pripadnika OSBiH u Misiji u Afganistanu. Od naših 10 oficira, njih osam bit će angažirano u sastavu kontingenta OS SR Njemačke u zoni Regionalne komande „Sjever“, a dva oficira bit će angažirana u sastavu kontingenta OS Kraljevine Danske u zoni Regionalne komande „Jug“. Naglasila je da je jasno da, kada poslanici i delegati PSBiH glasaju za slanje pripadnika OSBiH u ovakve misije, preuzimaju odgovornost za njihove živote. Zato, kad se donosi ovakva odluka, članovi Zajedničke komisije moraju preuzeti i političku odgovornost za njeno donošenje i treba jasno da znaju kakva je stvarna sigurnosna situacija na ovim lokacijama. Neprimjereno je odsustvo predstavnika predlagača na ovoj sjednici jer u okviru ove tačke dnevnog reda treba informirati članove Zajedničke komisije o tome šta učesnike ove misije očekuje u Afganistanu. Ipak, navela je da se veći broj naših oficira upućuje u sastav njemačkog kontingenta na sjever, gdje je situacija dosta mirnija. Iako su građani Njemačke sumnjičavi prema vojnim angažmanima u Afganistanu, većina poslanika Bundestaga podržala je slanje njemačkog kontingenta u Misiju ISAF u Afganistan, te je ocijenila da je zato dobro da i BiH pošalje svoje oficire na tu lokaciju, tako da bi oni imali iste uslove kao i njemački oficiri radeći u štabu njemačkog kontingenta. Pretpostavka je i da će i sve naše snage koje bi eventualno slali u ovu misiju ići također u zonu pod njemačkom komandom. Na kraju, BiH treba gledati i vlastiti interes u smislu da će oficiri koji učestvuju u ovoj misiji steći neophodna iskustva koja će biti značajna na našem putu prema NATO-u. S obzirom da u BiH vlada veliko interesovanje za ovu misiju i s obzirom da je upućivanje naših oficira u ovu misiju bilo na dobrovoljnoj bazi, u tom smislu smatra da ovu akciju treba podržati.

Jozo Križanović istakao je da problem analize sigurnosnog aspekta ovdje zaslužuje više pojašnjenja s obzirom da je u medijima pročitao da Njemačka ima ozbiljne posljedice zbog učešća svojih jedinica u Afganistanu. Ipak, Komisija treba imati principijelan odnos prema ovom dokumentu. Također je saglasan s primjedbama prethodnika da nije u redu da se predlagač ove odluke ne pojavi na ovoj sjednici i stoga je predložio da se rasprava o ovoj tački skine s dnevnog reda.

Branko Zrno istakao je da to sada nije moguće jer je Komisija već ušla u raspravu.

Sulejman Tihić također je naveo da bi bilo dobro da se neko iz Predsjedništva BiH pojavio na ovoj sjednici, ali je naveo i da ne treba očekivati od članova Predsjedništva BiH da prisustvuju raspravi o ovoj tački, zbog brojnih obaveza koje imaju. Opravdani razlozi za potvrđivanje ove odluke ogledaju se, prije svega, u činjenici da će naši oficiri, osim u finansijskom, napredovati i u profesionalnom smislu tokom učešća u ovoj misiji. On je naveo da je u okviru tačke 3., ocjene opravdanosti učešća pripadnika OSBiH u Misiji ISAF, rečeno da ne postoje relevantne informacije koje se odnose na sigurnosno stanje u tom misijama. Istakao je da se ovdje radi o oficirima, te da je to profesija koja podrazumijeva i određenu dozu rizika, ali je istakao da će sve snage koje učestvuju u ISAF-u, pa tako i naša, imati istu zaštitu. Rekao je da Zajednička komisija svakako treba izraziti zabrinutost što sigurnosni aspekt nije naveden u ovoj odluci.

Ivo Miro Jović rekao je da je on jedan od onih koji bi ad hoc podržali prijedlog odlaska naših vojnika, jer je to na simboličnom nivou. Samo prije nekoliko godina u našoj zemlji učestvovao je veliki broj stranih vojnika koji su u BiH čuvali mir, a jedan broj njih ovdje je ostavio i svoje živote, na čemu im trebamo biti trajno zahvalni. Danas se i BiH nalazi u poziciji da može poslati svoje vojnike u zemlju u kojoj treba uspostaviti mir. BiH je napravila velike iskorake ka NATO-u i on je ocijenio da će kompletan trud biti uzaludan ako se ova odluka Predsjedništva ne podrži.

Marina Pendeš, zamjenica ministra odbrane BiH, istakla je da je Ministarstvo odbrane BiH prilikom prikupljanja informacija i upućivanja ove odluke Predsjedništvu BiH, analiziralo i sigurnosni aspekt OSBiH u Misiji ISAF. Ovdje se trenutno radi o 10 oficira, što ne znači da se do kraja godine u Misiju neće uputiti određeni broj novih vojnika. Ovih 10 oficira već su prošli određene obuke i seminare i NATO ih je visoko ocijenio. Oni bi sutra trebali sačiniti relevantnu informaciju o sigurnosnoj procjeni, s obzirom da se u ovom trenutku ne raspolaže u potpunosti tačnom sigurnosnom situacijom u Afganistanu, te da se iz medija procjenjuje da je sjever ove zemlje manje rizičan od juga.

Branko Zrno zaključio je raspravu i pozvao članove Zajedničke komisije da se odrede prema ovoj odluci.

Odlučivanje

Članovi Zajedničke komisije su, sa sedam glasova „za“, jednim glasom „protiv“ i tri „suzdržana“ glasa, prihvatili Odluku o učešću pripadnika Oružanih snaga BiH u misiji „Snage međunarodne sigurnosne pomoći (ISAF)“ u Islamskoj Republici Afganistan i uputili je u daljnju parlamentarnu proceduru domovima PSBiH s prijedlogom za potvrđivanje.

Zajednička komisija je, također, jednoglasno usvojila **zaključak** kojim se izražava krajnje nezadovoljstvo zbog neprisustva predstavnika predlagača Odluke sjednici Komisije, kao izuzetno značajnog akta za BiH u procesu njenog pristupanja u punopravno članstvo u NATO. Prisustvo predstavnika predlagača sjednici Komisije bilo je neophodno i zbog davanja odgovarajućeg obrazloženja o sastavnim dijelovima Odluke, posebno obrazloženja o sigurnosnom aspektu upućivanja pripadnika OSBiH u navedenu misiju. Od predlagača Odluke stoga se očekuje da detaljnije informacije o sigurnosnom aspektu prezentira na sjednicama domova PSBiH.

Ad. 7. Razmatranje Odluke o postavljenju profesionalnih vojnih lica na formacijska mjesta u Oružanim snagama BiH (predlagač: Predsjedništvo BiH)

Branko Zrno istakao je da ni za ovu tačku, kao ni za prethodnu, nema prisutnog predstavnika predlagača, ali je naglasio da se radi o potvrđivanju onoga što već duže vrijeme funkcionira, te stoga zatražio od članova Komisije da podrže Odluku.

Odlučivanje

Članovi Zajedničke komisije jednoglasno su, sa 12 glasova „za“, prihvatili Odluku o postavljenju profesionalnih vojnih lica na formacijska mjesta u Oružanim snagama BiH i uputili je u daljnju parlamentarnu proceduru s prijedlogom domovima PSBiH da je potvrde.

Ad. 8. Razmatranje Informacije o realiziranju zaključaka Zajedničke komisije za odbranu i sigurnost BiH sa članovima Odbora za sigurnost i odbranu Skupštine Crne Gore (sačinilac:Ministarstvo sigurnosti BiH)

Ermin Pešto, predstavnik Ministarstva sigurnosti BiH, istakao je da je u ovoj informaciji obrađen jedan od zaključaka koji je proistekao iz sastanka predstavnika Zajedničke komisije za odbranu i sigurnost BiH i Odbora za bezbjednost Crne Gore na graničnom prijelazu Zupci-Sitnica, dok zaključci br. 1., 2. i 5. nisu sadržani u ovoj informaciji. Predložio je da Ministarstvo sigurnosti BiH zato dostavi još jednu pisanu, proširenu informaciju, koja u sebi sadrži informaciju o realizaciji i ovih zaključaka.

Članovi Komisije potom su jednoglasno usvojili zaključak da Ministarstvo sigurnosti BiH dostavi dopunu Informacije, s obrazloženjima zaključaka 1., 2. i 5., a koji su samo pomenuti u Informaciji.

Ad. 9. Zahtjev za dostavljanje mišljenja o eventualnim izmjenama i dopunama poslovnika domova PSBiH u vezi s nadležnošću Zajedničke komisije

Branko Zrno upoznao je članove Komisije da se Ad hoc Komisija za pripremu izmjena i dopuna, te prečišćenog teksta poslovnika Doma naroda obratila Zajedničkoj komisiji sa zahtjevom da u što kraćem roku dostavi svoje mišljenje o utvrđenim nadležnostima Zajedničke komisije i predloži eventualne izmjene ili dopune. Predložio je da se Zajednička komisija izjasni o ovom zahtjevu, te da svoje mišljenje dostavi i relevantnoj Ad hoc komisiji Predstavničkog doma, pošto rade identičan posao.

Nakon kraće rasprave, članovi Zajedničke komisije bili su saglasni da se ad hoc komisijama za pripremu izmjena i dopuna, kao i prečišćenog teksta poslovnika oba doma PSBiH upute slijedeći prijedlozi izmjena i dopuna poslovnika domova PSBiH:

1. U članu 45. Poslovnika Predstavničkog doma, tačku c) kojom se reguliraju odnosi Komisije za saobraćaj i komunikacije s Interpolom treba brisati i ugraditi je u član 54. Poslovnika, odnosno u član 48. Poslovnika Doma naroda, kojim je regulirana nadležnost Zajedničke komisije za odbranu i sigurnost. Naime, Zajednička komisija za odbranu i sigurnost nadležna je za nadzor nad radom NCB Interpola.
2. U navedenim članovima 54. Poslovnika Predstavničkog doma, odnosno 48. Poslovnika Doma naroda:
 - a. U tački d) iza riječi „odbranu“ treba dodati i riječi „budžeta za institucije iz oblasti sigurnosti“. Naime, Zajednička komisija nadležna je za oblast odbrane ali i za oblast rada sigurnosnih agencija;
 - b. Tačku h) treba brisati, s obzirom da je navedena djelatnost u pretežnoj nadležnosti Komisije za vanjske poslove oba doma PSBiH.
3. U članu 107. Poslovnika Predstavničkog doma, odnosno članu 101. Poslovnika Doma naroda, dodati novi stav (4) kojim bi se na isti način reguliralo ograničenje izjašnjavanja po dostavljenom mišljenju o prijedlogu zakona, kako je to učinjeno sa izjašnjavanjem u drugom čitanju. Novi stav (4) bi u skladu s tim glasio: „Proces iz stava (3) ovog člana može se ponavljati najviše dva puta, nakon čega se zakonodavni postupak obustavlja u slučaju da mišljenje ne bude prihvaćeno.“

Ad. 10. Tekuća pitanja:

- a) **Poziv za učešće članova Zajedničke komisije na Konferenciji Jadranske povelje u Tirani, 23. i 24.2.2009.**

Zajednička komisija odlučila je predložiti kolegijima domova PSBiH da na Konferenciju Jadranske povelje u Tirani, od 23. do 24. 2. 2009., upute sljedeće članove: Branka Zrnu, Šefika Džaferovića, Slobodana Šarabu, Adema Huskića i Vinka Zorića. Navedena delegacija koristila bi usluge vozača i vozila PSBiH.

- b) **Poziv OSCE-a za učešće predstavnika Zajedničke komisije na Seminaru iz oblasti sigurnosne politike, 10. i 11. 2. 2009.**

Zajednička komisija odlučila je predložiti kolegijima domova PSBiH da na Seminaru iz oblasti sigurnosne politike, koji će biti održan u Sarajevu 10. i 11. 2. 2009., učestvuju Dušanka Majkić i Ivo Miro Jović.

c) Poziv UNDP-a za učešće na inaugurionalnoj ceremoniji za uništenje municije u Vitezu, 4. 2. 2009.

Kako se 4.2.2009. održava sjednica Predstavničkog doma Parlamentarne skupštine BiH, na ovoj svečanosti mogu učestvovati samo članovi Komisije iz Doma naroda, kao i predstavnici Sekretarijata. Stoga je Zajednička komisija odlučila predložiti kolegijima domova PSBiH da na inaugurionalnoj ceremoniji za uništenje municije u Vitezu, 4.2.2009., učestvuju: Branko Zrno, Ivo Miro Jović, Željko Grubešić i Jovica Katić.

d) Informacija o sastanku s gosp. Rohanom Maxwellom, v.d. političkog savjetnika u Štabu NATO-a u Sarajevu, 27. 1. 2009.

Zajednička komisija primila je k znanju Informaciju o sastanku s gosp. Rohanom Maxwellom, v.d. političkog savjetnika u Štabu NATO-a u Sarajevu, održanom 27. 1. 2009.

e) Zahtjev za dostavljanje Informacije o hapšenju Vjekoslava Vukovića, pomoćnika ministra sigurnosti BiH za organizirani kriminal i borbu protiv terorizma

Na prijedlog Adema Huskića, članovi Zajedničke komisije odlučili su od Ministarstva sigurnosti BiH zatražiti da u što kraćem roku dostavi informaciju o hapšenju Vjekoslava Vukovića, pomoćnika ministra sigurnosti BiH za organizirani kriminal i borbu protiv terorizma.

Do kraja sjednice Branko Zrno još jednom je podsjetio članove Zajedničke komisije na sastanak koji će Komisija 5. 2. 2009. imati s predstavnicima vojno-diplomatskog kora u BiH, a nakon toga i na planiranu posjetu sjedištu SIPA-e.

Zapisnik sačinila
Dragica Hinić

Predsjedavajući
Zajedničke komisije
Branko Zrno